

Rapport dalla sessiun dil cussegl da vischernaunca dils 11-12-2023

Tractanda 1

Approbaziun dil protocol dalla sessiun dils 13-11-2023

Questa tractanda vegn spustada sin la proxima sesida.

Tractanda 2

Damonda dall'uniun Trun Cultura per ina contribuziun da frs. 100'000.- vid il tetg da lenn accessibel dalla Casa Carigiet

Vicepresidenta Erica Cavegn-Pfister presenta detagliadamein la tractanda. Trun ei liug da naschientscha e d'activitat da differentas persunalitads culturalas enconuschentas. Alois e Zarli Carigiet, Gieri Schmed, Matias e Hendri Spescha fan part dad els sco era numerus auters. Quei fatg remarcabel, che cuntegn dil reminent aunc dabia potenzial nunutilisau, vul l'uniun Trun Cultura far enconuschent ad ina vasta publicitat. Quei succeda en edifezis protegi e schibein historicamein sco era biograficamein relevantes per Trun, che vegnan reconstrui, resp. restaurai e mess en pei per l'utilisaziun culturala publica.

Suenter che l'uniun ha saviu endrizzar il zercladur 2023 cun success il "Spazi Spescha" per il relasch digl artist Matias Spescha sco local d'art e surdar quel alla publicitat, sedrezza si'attenziun uss principalmein al secund project parzial, la Casa Carigiet. La casa natala dils frars artists Alois e Zarli Carigiet, destruida d'in incidi il 2019, cuntegn in grond potenzial cultural el mument aunc diltutafatg nunnezegiau.

Vicepresidenta Erica Cavegn-Pfister presenta ina survesta davart il passau entochen ussa ell'uniun Trun Cultura en vesta dalla Casa Carigiet.

Entrar en tractanda vegn decidiu en votaziun unanima.

La reconstruciun digl entir baghetg ei planisada en treis fasas. Actualmein ein ins en l'emprema fasa, vul di la ruina ei vegnida rumida endadens e quest unviern ei previu d'installar in tetg da lenn accessibel e da baghegiar ora igl edifeci da freid. L'uniun Trun Cultura tschenta per quella emprema fasa la damonda alla vischernaunca per ina contribuziun da frs. 100'000.-. L'assicuranza d'edifezis cantunala (GVG) sco era la tgira da monuments e diversas fundaziuns han gia indicau lur susteniment, per part per l'emprema fasa, per part per igl entir project. Cugl effect da signal dil num "Carigiet" ei il potenzial da visitaders gronds. Grazia agl "Uorsin" ei Carigiet ina marca enconuschenta sigl entir mund. E grazia agl actur popular Zarli Carigiet ei il num Carigiet era colligiaus fermamein cun la historia dil cabaret e film dalla Svizra.

Il cussegl da vischernaunca meina discussiun en caussa. Ord il miez dat ei treis propostas per midadas (cundiziuns).

- Il tetg accessibel ei da montar tochen il pli tard ils 29 da fevrer 2024.
- Il palencau ei d'allontanar il pli tard tochen ils 29 da fevrer 2024.
- Igl ei la suletta summa che la vischernaunca conceda per l'immobilia Casa Carigiet.

Tut las treis propostas per midadas vegnan approbadas entras la maioritad dallas cussegliers e dils cussegliers.

Il cussegl da vischernaunca decida cun 10 : 4 vuschs da conceder il credit da frs. 100'000.- per il tetg da lenn accessibel dalla Casa Carigiet cun las midadas decidias.

Tractanda 3

Verificaziun dallas elecziuns communalas dils 26 da november 2023

Cusseglier Claudio Thalmann declara che la cumissiun per verificazion da votaziuns hagi controllau ils resultats dallas elecziuns communalas dils 26 da november 2023 ed anflau tut en uorden. En num dalla cumissiun propona Claudio Thalmann da verificar ils resultats publicai.

En votaziun unanima verifichescha il cussegl ils resultats publicai dallas elecziuns communalas dils 26-11-2023.

Tractanda 4

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

La presidenta
Flurina Bundi

Per la suprastonza communalia

Il president
Dumeni Tomaschett